

## Ekonomski fakultet Brčko u programu razmjene studenata sa španskim univerzitetima



U okviru ERASMUS + KA1 programa mobilnosti student Ekonomskog fakulteta Brčko Mirjana Mojić odlazi na razmjenu studenata na Univerzitet Haen u Španiji gdje će boraviti cijelu akademsku 2018./2019. godinu.

Erasmus je program Europske unije kojem je osnovni cilj podizanje kvalitete visokog obrazovanja i promocija međunarodnog dijaloga kroz mobilnost i akademsku saradnju. Programom je obuhvaćena i mjesečna stipendija u iznosu od 800 eura za troškove života kao i putni troškovi.

“Odlazak našeg studenta u Španiju kroz program razmjene ERASMUS + KA1 projekat je od velikog značaja za naš fakultet jer prvenstveno dokazuje kvalitet našeg studijskog programa i kvalitet samog fakulteta. Možemo da budemo ponosni što imamo predstavnika u ovom projektu” rekao je Srđan Lalić, dekan Ekonomskog fakulteta Brčko.

Ovo je prvi put da student sa Ekonomskog fakulteta odlazi na razmjenu studenata u okviru programa razmjene studenata u projektu ERASMUS + KA1.

“Boraviću u Haenu u Španiji devet mjeseci, slušaću i polagati ispite na engleskom jeziku. Svi položeni ispiti biće priznati na Ekonomskom fakultetu Brčko. Očekujem da naučim mnogo novih stvari i potrudicu se da naučim španski jezik” rekla je Mirjana Mojić, studentica Ekonomskog fakulteta Brčko.

Rukovodstvo fakulteta je istaklo i da je Ekonomski fakultet Brčko opredijeljen za međunarodnu razmjenu studenata te su ovo ljeto posjetili Univerzitet Voronjež u Rusiji.

“Postoje neke predrasude da je Rusija drugačija međutim oni ulažu veoma mnogo u razvoj nauke. Tražili su naše naučne radove na bilo kojem svjetskom jeziku želeći na taj način naučiti nešto i od nas. Isto tako nude i našim studentima da dođu kod njih” kaže Lazar Radovanović, prodekan za naučno-istraživački rad Ekonomskog fakulteta Brčko.

U periodu od 02. 07. 2018. do 27. 07. 2018. godine studenti Ekonomskog fakulteta Brčko su obavili ferijalnu praksu u Centralnoj banci Bosne i Hercegovine Filijala Brčko.

“Naučile smo mnogo i stekle bogato iskustvo koje će mi koristiti kasnije u budućnosti nakon fakulteta” rekla je Emina Terzić, studentica Ekonomskog fakulteta Brčko.

“Ovom prilikom želim da pozovem sve one srednjoškolce koji se još uvijek nisu upisali jer su neodlučni da se odluče za Ekonomski fakultet Brčko jer pored visokog nivoa i kvaliteta obrazovanja koje fakultet nudi tu je i mogućnost da i jedan dio svojih studija provedu i u inostranstvu” poručila je Renata Lučić, prodekana za nastavu i studentska pitanja Fakulteta.

**Економски факултет Брчко**  
**BDC Televizija**